

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

KENYATAAN PERSATUAN PENGGUNA PULAU PINANG (CAP) YANG MENGELIRUKAN

PUTRAJAYA, 27 NOVEMBER 2021 - Kementerian Perdagangan Dalam Negeri dan Hal Ehwal Pengguna (KPDNHEP) memandang serius kenyataan yang dibuat oleh Persatuan Pengguna Pulau Pinang (CAP) terhadap kenaikan harga sayur yang mengelirukan.

2. Kenyataan yang dibuat berdasarkan pemantauan di empat buah pasar awam di Pulau Pinang itu tidak wajar diterbitkan secara umum yang telah menimbulkan persepsi yang tidak tepat serta keresahan di kalangan pengguna seolah-olah ianya berlaku secara melata di seluruh negara.

3. KPDNHEP sentiasa prihatin dan proaktif terhadap isu kenaikan harga barangan keperluan pengguna seperti telur, ayam dan sayur-sayuran. Justeru, Kementerian mengalu-alukan sumbangan persatuan pengguna dan institusi penyelidikan dalam isu yang sangat penting kepada rakyat ini.

4. Kementerian berharap agar dapatan serta hasil kajian berkenaan harga barang keperluan dapat dibincangkan terlebih dahulu dengan Kementerian agar data-data tersebut dapat dirujuk-silang dengan data yang dikumpulkan secara harian di lebih dari 1,500 premis sebelum ianya diterbitkan menjadi sesuatu yang bermakna kepada negara dan pengguna Malaysia.

5. Pemantauan yang dilaksanakan oleh KPDNHEP mendapati kebanyakan harga sayur masih terkawal dan berbeza-beza mengikut lokasi. Kenaikan harga sayur seperti yang dilaporkan persatuan pengguna tersebut bukanlah fenomena di seluruh negara.

6. Hasil pemeriksaan dan pemantauan yang dilakukan oleh pihak KPDNHEP di seluruh negara mendapati pembukaan semula semua sektor ekonomi menyebabkan berlaku permintaan yang sangat tinggi secara mendadak terhadap barangan seperti telur, ayam dan juga sayur.

7. Peningkatan ini tidak sepadan dengan keupayaan pengeluar barangan tersebut yang telah mengurangkan kuantiti pengeluaran semasa pandemik akibat permintaan yang berkurangan. Ini sebenarnya bukan sahaja berlaku di Malaysia, malah ianya merupakan fenomena dunia.

8. Kenaikan harga sayur keluaran tempatan dikesan berlaku di beberapa tempat dan berpunca daripada faktor cuaca, logistik dan peningkatan kos baja dan racun. Isu-isu seperti hujan lebat, banjir dan tanah runtuh di Cameron Highlands serta kawasan tanaman sayur sekitarnya didapati turut menjejaskan rantaian pengedaran, terutama bagi sayur-sayur dari tanah tinggi tersebut.

9. Selain itu, kesukaran mendapatkan tenaga kerja menyebabkan hasil tidak dapat dikeluarkan secara maksimum, sekali gus mengakibatkan bekalan berkurangan yang akhirnya telah menyumbang kepada punca kenaikan harga sayur-sayuran di pasaran.

10. Bagi sayur-sayur import pula, harga di negara pengeluar yang telah meningkat dan masalah-masalah pengeluaran yang lain seperti isu kenaikan harga input pertanian dan cuaca di negara pengeluar juga turut memberi kesan.

11. Kenyataan Persatuan Penanam Sayur Cameron Highlands sangat optimistik bahawa harga sayur berpotensi untuk kembali stabil apabila pengeluaran dapat ditingkatkan pada tahap normal dengan bantuan cuaca, logistik dan penambahan tenaga buruh di ladang.

12. Bagaimanapun, sebagai langkah untuk menangani isu ini, **KPDNHEP serta Kementerian Pertanian dan Industri Makanan (MAFI) telah menubuhkan Jawatankuasa bersama serta mengadakan libat urus dengan pihak berkepentingan dan pemain industri bagi mendapatkan pandangan serta cadangan berhubung isu ini.** Melalui sesi libat urus

yang telah dijalankan, pihak pemain industri yang terkesan telah memaklumkan keperluan mereka untuk mendapatkan bantuan kewangan daripada Kerajaan bagi membantu meringankan beban kos operasi, yang telah memberi impak kepada harga barangan di pasaran.

13. KPDNHEP dan MAFI juga telah mengadakan perjumpaan dan perbincangan bersama Kementerian Kewangan (MOF) pada 24 November 2021 yang lalu bagi mendapatkan penyelesaian secepat mungkin bagi menangani masalah ini. Hasil daripada perbincangan ini, pihak MOF secara dasarnya bersetuju untuk mempertimbangkan saranan dan cadangan daripada kedua-dua kementerian dan sebarang keputusan berkaitan bantuan kewangan kepada pemain industri akan diumumkan oleh MOF.

14. Mekanisme penyaluran bantuan fiskal kepada pemain industri antara lain bertujuan supaya sebarang peningkatan, yang setakat ini dikesan berlaku hanya di beberapa kawasan dan bersifat terpencil (isolated) serta mampu ditangani sepenuhnya. Peruntukan kewangan yang bakal diberikan kepada pengeluar diunjurkan mampu menyerap lonjakan kos yang akhirnya terpaksa ditanggung oleh pengguna. Perincian lanjut berhubung usaha ini akan dimaklumkan dari semasa ke semasa.

15. Selain itu, pemantauan dan pemeriksaan harga barang juga dilakukan secara aktif dan proaktif setiap hari oleh pegawai penguat kuasa dan pegawai pemantau harga KPDNHEP di seluruh negara untuk memastikan harga barang-barang termasuklah sayur-sayuran berada dalam keadaan stabil.

16. KPDNHEP boleh mengambil tindakan ke atas mana-mana peniaga di setiap rantai bekalan sekiranya terdapat unsur pengambilan keuntungan secara tidak munasabah (mencatut) di bawah Akta Kawalan Harga dan Antipencatutan (AKHAP) 2011.

15. Peniaga yang dikesan mengambil kesempatan dengan mencatut boleh dikenakan tindakan tegas di bawah Seksyen 14(1), AKHAP 2011. Sekiranya disabit kesalahan, boleh dikenakan denda sehingga RM500,000.00 bagi perbadanan/ syarikat dan sehingga RM100,000.00 bagi

individu atau dipenjarakan selama tempoh tidak melebihi tiga (3) tahun atau kedua-duanya sekali.

16. Bagi memastikan hak pengguna sentiasa dijaga dan segenap kelompok masyarakat dapat memperoleh bekalan asas pada harga berpatutan, KPDNHEP mencadangkan orang ramai untuk menggunakan **aplikasi Price Catcher** yang dibangunkan kementerian. Menerusi tinjauan harian meliputi lebih **400 barangan keperluan asas**, aplikasi ini berupaya memberi pilihan yang lebih meluas kepada pengguna khususnya dari segi aspek harga.

DATO SRI ALEXANDER NANTA LINGGI
MENTERI PERDAGANGAN DALAM NEGERI DAN HAL EHWAL
PENGUNA
27 NOVEMBER 2021

#####

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidaktentuan. Perdagangan pengedaran perlu kukuh bagi menampan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah self-regulated, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusniaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP:

